

Yirfuxrsor Sul

1

¹ Ngo mel Barloxr a. Ngo Arbosobo xiar dae mel dax zox dae a, Yisu Zidu miardal dae ca ddei bei a. Yirfuxrsor zzi gga hher dae Arbosobo ddei cassor-worssor, hherdder Yisu Zidu leil ddarzzi su yar dax hher ji dae ca mel, ngo nia leil xil vaexr gger. ² Niul ddei Arbbor Arbosobo nei niul ddei Seirpor Yisu Zidu leil nia leil cirza-hanga seirseir mel meixl gger lol nia, nia leil nixmox zzaso lol nia!

Zidu Dax Hher Ji Dae Cirza-hanga Seirseir Hal Mel

³ Niul Zidu dax hher ji dae a, Arbosobo dder merlabbor ddei cirza-hanga seirseir hal mel niul leil gger a, niul ddei xiu ddei leil seir lol, yel ngo Arbosobo leil bbeix zae gger. Yar mel niul ddei Seirpor Yisu Zidu Yarbbor a. ⁴ Yar niul leil azo gger a neil? Azo lei nr zza seir dder yar niul leil tiur teixl lei a Zidu dax hher ji dae lol, yar meixsaer qier leil seirceix-seirmaer lol, botaddu cirdoxr lei nr zza lol. ⁵ Arbosobo niul leil perniar a, yar bei ggese dae mel dax zox dae a, Yisu Zidu bei dae mel leil ngol dae a, niul leil yar ddei ssormine loxr lol. Eil ddei mel azo lei nr zza seir dder yar dixl har ho a. ⁶ Niul mel Arbosobo ddei Ssorzil-ssorya ddei dax hher ji dae a, yel Arbosobo dder niul xiar lei xiar nr ci seirseir mel niul leil meixl gger. Yar eine bei a arseir lei yar leil bbeix zae gger nia. ⁷ Zidu niul leil weix a sirnilni ddux a, niul leil zuixl gga jiuxl teixl lei a; Arbosobo niul leil ssoxrsuxl a. Arbosobo niul leil seirseir einezeixl ar ke meixl gger. ⁸ Yar niul leil olnolddu lol a hoxrhoxr nr hoxr saexl lol, yar leil saexl dax lol, cirza-hanga lei zzeilixl-zzeilor meixl gger.

⁹ Arbosobo mel Zidu bei dae mel leil ngol dae a, yar dixl har zaxr dae seirseir mel bei niazzir. Yar dixl har dae a halleix si nr saexl mel eilleix

yar niul leil saexl lol. Yar eine bei a mel yar bei ggese a nga arddeir a.

¹⁰Yar bei niazzir dae mel mel hherdder yar dixl har dae nixixl ddei ci a mel, yar dder merlabbor middurbbor hazza-hamaer lei Yisu Zidu leil jia gger a yar leil guaxr lol, yar leil vaer zzir ddei bei lol hherdder oldde ddei nga a.

¹¹Arbosobo mel yar dixl har dae ddei dax zox dae a ngua leil Yisu Zidu dax hher ji dae lol, yel yar ddei cassor-worssor loxr lol. Yar mel yar bei niazzir dae mel sael a hazza-hamaer bei. ¹²Yar eine bei a mel, ngua Yisu Zidu leil ddarzzi beil su mel^a leil yar ddoddomo bei dae a yar leil bbeix zae gger lol. ¹³Nia mel ddarzi mel leil bbejjiur ho a. Ddarzi eil mel hherdder Yisu nia leil arsae jiuxl biar dae ddar seirseir mel nga a. Nia ddarzi mel leil bbejjiur nei Zidu leil ddarzzi a, yel Arbosobo dder nia leil gger nia bbeix har zaxr goxr mel nia leil gger, hherdder yar ddei Xiu ddei leil nia nixmox zzar hher ji dae lol a hoxltexr bei ho sael a nga a.^b ¹⁴Yar ddei Xiu ddei niul nixmox zzar hher ji dae a hoxltexr bei ho a mel, yar niul leil gger nia bbeix har zaxr goxr kebal hal mel arsaebeilei niul li wo ddo. Arbosobo yar ddei cassor-worssor maelmaerjia leil zuixl gga jiuxl teixl lei jjia ho a mel, niul dder hal mel li wo ddo a.^c Yar eine bei a mel yar ddoddomo bei dae a yar leil bbeix zae gger lol.

^a**1:12** *Yisu Zidu leil ddarzzi beil su mel* Ca cirmelmel a zzir dae a ca eil mel Yoxrtaexl su ca.

^b**1:13** *yar ddei Xiu ddei leil nia nixmox zzar hher ji dae lol a hoxltexr bei ho sael a nga a* Yar eine bei a mel yaa leil yaa Arbosobo ddei cassor-worssor loxr ho a saexl lol.

^c**1:14** Zidu mel niul leil weix a, sirnilni ddux a, si a. Yel Arbosobo niul leil zuixl gga jiuxl teixl lei a, niul leil ssoxrsuxl a. Yar Yisu ddei sirnilni sser a, niul leil vae xixl lei sael a nga, niul leil yar ddei cassor-worssor loxr lol a.

Barloxr Arbosobo Dax Ddar Biar

¹⁵ Yel ngo bbejjiur a nia Seirpor Yisu leil ddarzzi, halae Arbosobo ddei cassor-worssor leil perniar, ¹⁶ ngo dder nia leil weix a cirleixr nr nor Arbosobo leil nawo. Ngo Arbosobo dax ddar biar a lei zoxlzoxl a nia leil holcir dae. ¹⁷ Ngo nia leil ddar biar gger car, zoxlzoxl a niul ddei Seirpor Yisu Zidu ddei Arbosobo leil qiuxr a, yar ddei Xiu ddei nia leil gger lol a, nia leil hoxrhoxr nr hoxr saexl lol, ho bei ho Arbosobo leil saexl dax lol. Yar mel merhhexr Arbbor ddei nga a; yar cirse-cirsil middux. ¹⁸ Ngo Arbosobo leil qiuxr a nia ddei nixmox taex leil alddur sael a ggapu gger lol, nia nixmox zzar bbele lol a, yel nia Arbosobo ddei cassor-worssor loxr ho a, nia azo li wo ddo nia leil saexl lol. Halae Arbosobo yar ddei cassor-worssor mel leil gger nia bbeix har zaxr dae hal mel yarzi sael miur, yarzi sael naxrcixl nia leil saexl lol. ¹⁹⁻²⁰ Yar ddoddomo bei dae mel ddo zzir mel nga a nia leil saexl lol. Arbosobo yar leil ddarzzi su ca mel leil ddoddomo bei dae mel Yisu leil bei dae mel dax leisel. Yisu si a Arbosobo ddoddomo bei a, yar leil gol du xixl lei lol, yoxl merhhexr gga yar yo piar a gga cux dae lol a. ²¹ Yisu Zidu mel bir merlabbor middurbbor vaervaerpor bei su, quexrlixl zza su, yarzi ddo su, seirpor bei su nei middux zzir maelmaerjgia leil lei hormo vaer leixl. Eilleix lar vaer leixl nr nga a nei arddolcar lei vaer leixl. ²² Arbosobo mel hazza-hamaer lei Yisu Zidu qihher woxrke hher dae lol a yar ddei ddar no lol, yar leil maelmaerjgia ddei oldde bei lol a mel jiaxlhuixl leil seir lol. Jiaxlhuixl mel dder Yisu leil ddarzzi su maelmaerjgia leil bbeix a. ²³ Yaa mel dder Yisu Zidu ddei ggecir sael a nga. Yisu jiaxlhuixl gga bbilbbi hher ji dae, merlo-milo maelmaerjgia gga lei bbilbbi hher ji dae.

2

Si Ho A Yoxl Gol Du Xixl Lei

¹ Halleix nia mel zuixl bei doxr a, Arbosobo ddei ddar nr no, nia ddei xiu ddei mel si ho a.^d ² Nia middurbbor cirza-hanga nr seir mel dax bei mae goxr a. Nia neir zzirmar Sardaxl te ddei ddar no. Yar mel Arbosobo ddei ddar nr no su ca mel leil guaxr su te nga a. ³ Halleix niul lei Arbosobo ddei ddar nr no su ca mel sael a nga, nixmox zzar arsae xiar dae mel dder arsae bei ssi, ggecir ddei leil cirdoxr lei nr guaxr, buxlguaxr-laxlsixr bei ssi. Niul kebal ca mel dax ciryoxr a nga, xiu teixl lei a dder Arbosobo sirzzi a faxr nia ca mel nga a.

⁴⁻⁵ Niul zuixl bei a, niul ddei xiu ddei si ho a bbeixarnar, nael Arbosobo niul leil yarzi sael zoxlnixr, niul leil yarzi sael perniar a, yar niul ddei xiu ddei leil Yisu Zidu dax cirgo a gol du xixl lei lol. Nia leil jiuxl wo a mel, Arbosobo nia leil seirseir meixl gger a nga arddeir a. ⁶ Arbosobo mel niul leil Zidu dax hher ji dae lol a, yar dax cirter a gol du xixl lei lol ho a; yar halae niul leil Yisu Zidu dax cirgo a merlabbor cux dae a zzirmar bei lol ho a. ⁷ Yar eine bei a mel arddolcar a ca maelmaerjia leil yar niul leil perniar, Yisu Zidu bei dae mel leil ngol dae a, niul leil cirza-hanga seirseir hormo meixl gger a saexl lol.

⁸ Nia Yisu Zidu leil ddarzzi a mel, yar dder nia leil jiuxl. Nia leil jiuxl wo a mel, nia azo lerler seirseir bei a jiuxl wo nr nga a nei, Arbosobo nia leil cirza-hanga seirseir meixl gger a nga arddeir a. ⁹ Arseir lei seirseir bei a armael leil jiuxl wo nr nga a mel, yaa dder azo kuar ddu nr zza. ¹⁰ Niul leil mel Arbosobo bei teixl lei a. Arbosobo niul leil coxl a mel niul leil Yisu Zidu dax hher ji dae lol a seirseir hal mel bei ssi lol. Eil ddei mel yar arddol-cirsil dder dixl har zaxr dae ddei nga a.

Yoxrtaexl Su Ca Nei Yoxrtaexl Su Nr Nga Ca Mel Ca Ciryoxr A Loxr

^d**2:1** *nia ddei xiu ddei mel si ho a* Ddar eil qier ddei yilsi mel dder yaa Arbosobo dax bbe kae a, cirse-cirsil lei yar dax goxr dae nr var.

¹¹ Ggecir ddei leil bbeix ci a mel nia Yoxrtaexl su ca nr nga. Yoxrtaexl su ca mel bbeix: “Nguua mel gelir^e bei goxr a; nia mel gelir bei nr goxr,” eine bbeix. Nael yaa gelir bei a mel ggecir ddei leil bei lalnga, nixmox ddei dax guaxr-nr-zoxr. ¹² Halleix nia Zidu dax cirdoxr lei guaxr-nr-zoxr; nia Yirsaexllixl su ca nr nga; Arbosobo yar ddei cassor-worssor mel leil gger nia bbeix har zaxr goxr hal mel nia li wo nr ddo. Nia middurbbor hher dae a, Arbosobo leil nr saexl, cirse-cirsil yar dax cirgo a hher dae loxia nr cexr. Nia eil mel maelmaerjjia holcir dae nia. ¹³ Halleix nia mel Arbosobo dax giex vimir su ca mel a. Nael eilleix nia Yisu Zidu dax hher ji dae ho a. Yar mel nia leil weix a si a, yel nia dder yar ddei sirnilni leil koxl dae a, Arbosobo dax naer lei ho a.^f

¹⁴ Zidu si a mel nguua Yoxrtaexl su ca nei nia Yoxrtaexl su nr nga ca mel agala gga giex gex dae lu hal dur caexr pixl gger sael a nga a; yel niul leil zzicarzzi leil vuxr-nr-yixr lol, niul leil ca ciryoxr a loxr lol a zzi dax toltor a bei lol a. ¹⁵ Zidu niul leil weix a si a, niul dder Moxrxi vaexr dae Lixlfaer gga leiddur mel dax nei miardal dae mel dax bei nr mae lei niul leil jiul wo ddo. Yar eine bei a mel Yoxrtaexl su ca nei Yoxrtaexl su nr nga ca mel leil yar dax hher ji dae lol a, ca sixl loxr lol, zzi dax toltor a nga lol.

¹⁶ Zidu sixrzixljiaxl leil si a, yaa leil zzicarzzi leil nr dir lol, yaa leil ca ciryoxr a loxr lol, Arbosobo dax toltor a nga xixl lol. ¹⁷ Yar halae yar ddei ddar seirseir mel, Arbosobo dax naelnaer a hher dae Yoxrtaexl su ca mel leil nei Arbosobo dax giex vimir dae Yoxrtaexl su nr nga ca maelmaerjjia leil lei biar gger a. Yar ddei ddar seirseir mel mel ca mel leil Arbosobo dax toltor a nga lol, halae Yoxrtaexl su ca nei Yoxrtaexl su

^e**2:11** *gelir* Gelir bei a mel dder capor ddei sirbeixl dder olniuxniux zzi ddei caer teixl gger.

^f**2:13** Xiboxrlaexr Sul 9:11-28 leil Yisu niul leil arsae Arbosobo dax seir xixl lol biar dae.

nr nga ca mel leil zzi dax toltor a nga lol cexr. ¹⁸ Ngua Yoxrtaexl su ca nei nia Yoxrtaexl su nr nga ca maelmaerjjia lei Yisu Zidu leil koxl dae a, Arbosobo ddei Xiu ddei niul leil Merhhexr Arbbor dax ddar biar cexr lol.

¹⁹ Eine nga a mel, nia kebal mermi nei kebal goxrjia su ca nr nga a; Arbosobo ddei cassor-worssor mel dax cir goxr a loxr a; Arbosobo dax cir hhexr a loxr a yar ddei ssormine nga a. ²⁰ Bir dae a bbeix, niul xi ar zzir nga arddeirnga a, xiezi nei Yisu miardal dae ca mel hherdder niul ddei sixrjiuxr sael a nga a; Yisu armael nael sixrjiuxr giexrluxl gga legelbbe zoxlyoxl zzir taex sael a nga a. ²¹ Xi cirzzir-lorbba lei Yisu leil koxl dae a zzarvul-zzarmae lei zzi dax zilzir gga gex dae, ho zi ho zi vaer a, hherdder Seirpor Arbosobo ddei xi seirceix-seirmaer zzir loxr a. ²² Nia Yisu Zidu dax hher ji dae a mel, nia legelbbe sael a nga. Yisu Zidu nia leil sser dae a Arbosobo ddei xi zzir zi mal a. Arbosobo ddei Xiu ddei halmaex gga hher dae.

3

Barloxr Mel Yoxrtaexl Su Nr Nga Ca Mel Leil Yisu Zidu Ddei Ddar Seirseir Mel Biar Gger

¹ Yel ngo nia leil Arbosobo dax ddar biar gger. Halleix ngo mel Yisu Zidu ddei ddar seirseir mel nia Yoxrtaexl su nr nga ca mel leil biar gger a, ca mel dder ngo leil ge du lei a. ² Nia lei bbejjiur goxr a; Arbosobo ngo leil seirseir meixl gger a nia leil yar ddei ddar biar gger lol. ³ Halleix ca nr saexl hal mel Arbosobo ngo leil saexl lol a. Zoxlyoxlyoxl mel ngo vaexr ze lei ho a. ⁴ Nia ngo vaexr ze lei mel leil i ho a nia dder saexl var Zidu leil biar dae ddar mel Arbosobo ngo leil saexl lol ho a. ⁵ Yisu Zidu leil bbeix dae mel mel halleix Arbosobo arseir leil lei nr saexl lol, nael eilleix yar yar ddei Xiu ddei leil sser dae a, yar tiur teixl lei Yisu miardal dae ca mel leil nei xiezi mel leil saexl lol ho a. ⁶ Yisu ddei ddar seirseir mel leil

ddarzzi a, Yoxrtaexl su nr nga ca mel nei Yoxrtaexl su ca mel cirgo a Arbosobo ddei ssormine loxr a, yar ddei seirseir mel li wo ddo. Yaa mel hherdder ggecir cir ddei leil a niar gex dae a. Yaa cirgo a Yisu Zidu dax hher ji dae a, Arbosobo yaa leil gger nia bbeix har zaxr dae mel li wo ddo. Ca mel nr saexl mel hherdder eil mel nga a.

⁷ Arbosobo mel yar ddoddomo bei dae mel dax zox dae a, yar ngo leil seirseir meixl gger a, ngo leil Yisu ddei ddar seirseir mel ca leil biar gger su bei lol. ⁸ Arbosobo ddei cassor-worssor mel gga ngo azo lei nr suax bbeixarnar, nael Arbosobo halae ngo leil seirseir meixl gger a, ngo leil Yisu ddei ddar seirseir mel Yoxrtaexl su nr nga ca mel leil biar gger ssi lol, yel yaa leil ca mel xiar lei xiar ci nr xie Zidu ddei seirseir hal mel saexl lol. ⁹ Halae yar ngo leil tiur a yar arsae ca leil jiuxl ca maelmaerjjia leil biar gger ssi lol. Eil ddei mel dder azo lei nr zza seir cir dae a eilleix zzeze ci a sael ca leil saexl lol ddei nga a. Yar mel dder cirza-hanga coxl su Arbosobo ddei nga a. ¹⁰ Arbosobo eine bei a mel, jiaxlhuixl leil sser dae a, merlabbor middurbbor quexrlixl zza tisir nei neir mel leil saexl lol, yar mel yarzi sael olnolddu, hazza-hamaer lei yar saexl. ¹¹ Azo lei nr zza seir dder Arbosobo dixl har dae eil mel, Seirpor Yisu Zidu leil ngol dae a bei arddeir a. ¹² Yel niul Yisu Zidu leil ddarzzi a yar dax hher ji dae a mel niul dder azo gexr ddu lei nr zza Arbosobo dax ddar biar cexr. ¹³ Ngo nia leil weix a goxr sol a mel, nia dder si dax kuar ddu zza. Yel ngo nia leil qiuxr, nia nixmox bbiex nr ddo.

Zidu Ca Leil Yarzi Sael Perniar

¹⁴ Eine nga a ngo dder Arbosobo xilmeir cizixl gger dae a, yar dax ddar biar. ¹⁵ Arbosobo mel merlabbor middurbbor cirhhexr-hanga leil coxl teixl lei su ddei nga a. ¹⁶ Arbosobo mel ddo zzir ddei nga a; yar cirza-hanga sser lei sser jjia nr ddo zza. Yel ngo dder Arbosobo leil qiuxr a, yar ddei Xiu ddei leil nia nixmox zzar hher ji dae lol a, nia leil hhel du

lei lol, yar leil ddarzzi doxr dae lol. ¹⁷ Ngo halae Yisu Zidu leil qiuxr a, nia yar leil ddarzzi a, yar nia nixmox zzar hher ji dae a; yel nia nixixl goxr a yar nia leil perniar mel leil koxl dae hherdder sixzwei mel yarji ddei leil koxl dae a velper a ner dae var sael a nga. ¹⁸⁻¹⁹ Ngo Arbosobo leil eine qiuxr a mel, nia leil nei Arbosobo ddei kebal cassor-worssor maelmaerjia leil lei Yisu niul leil arsaesael perniar saexl lol. Yisu mel niul leil yarzi sael perniar a, arseir lei yar niul leil perniar dae hal mel biar jjia nr xie. Eine nga bbeixarnar, nael ngo halae Arbosobo leil qiuxr a, nia leil eil mel xiar ci xie lol, yel Arbosobo leil nia nixmox zzar bbilbbi hher ji dae lol.

²⁰ Arbosobo mel yar leil ddarzzi su ca mel nixmox zzar hher ji dae a ddoddomo bei dae, yar niul xiar ci nr xie mel lei bei ci xie. Yar bei dae mel bir niul yar dax qiuxr dae hal mel leil hormo miur leixl. ²¹ Yel ca circoxr-hanga yar leil bbeix zae gger nia. Yisu Zidu bei dae mel leil koxl dae a jiaxlhuixl gga yar leil bbeix zae gger nia. Cirse-cirsil bbeix zae gger nia. Amae!

4

Yisu Leil Ddarzzi Su Ca Mel Ggecir Cir Ddei A Loxr Sael A Nga

¹ Ngo mel Seirpor Yisu leil visser a ca mel ngo leil ge du lei a; yel ngo nia leil zabbar seirseir a quex, nia nixixl goxr ca mu a Arbosobo leil ggese lol nia. ² Nia azo bei lei col nr ddo, ddar te a lei norlixlix arla te nia, ssertexr zza nia, ca leil perniar nia, zzicarzzi leil ssoxrsuxl nia.

³ Arbosobo ddei Xiu ddei nia leil zzicarzzi dax toltor a bei lol a, nia leil zzi dax cir piar a bei lol. Nia arsaе bei var arsaе bei a, eine bei zeі si nia.

⁴ Ggecir mel cir ddei lar zza, Xiu lei cir ddei lar zza.⁹ Ciryoxr a nga,

⁹4:4 *Ggecir mel cir ddei lar zza, Xiu lei cir ddei lar zza, Ggecir eil ddei*

Arbosobo nia leil tiur teixl lei a nia zzi dax ciryoxr a li wo loxia. ⁵ Seirpor mel cir ddei lar zza;^h niul ddarzzi dae mel ciryoxr a nga;ⁱ niul sexlsir a mel ciryoxr a sexlsir.^j ⁶ Arbosobo lei cir ddei lar zza. Yar mel dder yar leil ddarzzi su maelmaerjjia ddei Arbbor ddei nga a; yaa leil guaxr su ddei nga a. Yar yar ddei cassor-worssor maelmaerjjia leil sser a miar bei. Yar yaa cirddeir-hanga nixmox zzar hher ji dae.

⁷ Yisu niul leil seirseir meixl gger dae mel mel, yar xiar dae ddei dax zox dae, yar arseir leil arsae gger niazzir mel dder arseir leil arsae bbe gger.

⁸ Hherdder Arbosobo Ddei Sul ber leil vaexr dae a bbeix:

“Yar mu zzir ggie halmaex ddeix ci car a,
ssu si ca mel leil hier dae,
cirza-hanga seirseir mel ca mel leil meixl gger,”^k

eine bbeix a.

⁹ Yar merlabbor mu zzir ggie ddeix ci a mel, hoba middur zzar miax zzir ggie xilmeir ze i ci nia zzarmar? ¹⁰ Middur zzar miax zzir ggie ze i ci su hal

mel Yisu ddei ggecir ddei nga a. Xiu eil ddei mel Arbosobo ddei Xiu ddei nga a.

^h4:5 *Seirpor mel cir ddei lar zza* Yisu leil ddarzzi su ca mel Yisu Zidu leil yaa ddei Seirpor bei lol. Kebal seirpor nr zza.

ⁱ4:5 *niul ddarzzi dae mel ciryoxr a nga* Yiksi mel dder niul Yisu leil lar ddarzzi.

^j4:5 *niul sexlsir a mel ciryoxr a sexlsir* Ca cirmemel a zzir dae a Yisu leil ddarzzi su mel ajjix sser a Merhhexr Arbbor leil, yar Ssor Yisu Zidu leil, nei Arbosobo ddei Xiu leil koxl dae a sexlsir. Ca cirmemel a zzir dae a Arbosobo yar ddei Xiu sser a ca leil sexlsir gger.

^k4:8 Sipi Sul 68:18 leil vaexr dae.

ddei nei merlabbor mu zzir ggie ddeix ci su hal ddei mel cir ddei a nga. Yar eine bei a mel yar dder zzarvul-zzarmae lei hher dae, nr hher lei ar maex nr zza. ¹¹ Yar ca mel leil seir lol a, ca cirmelmel leil a nael yar miardal dae ca bei lol, cirmelmel leil a nael xiezi bei lol, cirmelmel leil a nael yar ddei ddar seirseir mel ca leil biar gger su bei lol, cirmelmel leil a nael sulmulsu bei lol, cirmelmel leil a nael yar leil ddarzzi su mel leil guaxr lol, hherdder yaloxlmo ya leil guaxr sael a nga. ¹² Yar eine bei a mel Arbosobo ddei cassor-worssor mel leil nixmox zzar bei har zaxr a, yaa leil Arbosobo leil visser lol, halae Zidu ddei ggecir hherdder yar leil ddarzzi su mel leil ho bei ho yar sael a loxr lol. ¹³ Hherdder niul Arbosobo ddei Ssor Zidu leil saexl nei yar leil ddarzzi a cir piar a bei, yar dax bei mae gaxzi, niul yar sael a seirceix-seirmaer loxr hane zzeze ci. ¹⁴ Eine nga a mel niul dder zeixleixr aniuessor sael a nga nr var. Bolaxl ddaexr a locixl-loge hal mel sael a nr var, mersi sael a jia cixl jia gel jia nr var. Yarzi jiuxr ca hal mel nr hoxr mul gger dae mel niul leil fur lei lol nr var. ¹⁵ Doxgoxleixr niul halae ca mel leil perniar a, yaa leil ddarzi bbeix gger. Niul azo bei lei ho bei ho Yisu Zidu leisel. Yar mel dder jiaxlhuixl ddei oldde ddei nga a. Jiaxlhuixl mel dder yar ddei ggecir ddei nga a. ¹⁶ Yar mel ggecir ddei leil zzur sser a hherggar cirzixl-hanga maelmaerjia cirgo a niar gex dae lol halae ggecir cirmaex-hanga armael bei mibbe mel bei lol. Ciryoxr a nga, yar jiaxlhuixl gga ca mel leil ggecir cir ddeir a loxr lol, halae ca cirddeir-hanga armael bei mibbe mel bei lol a zzicarzzi leil perniar, yel jiaxlhuixl ddei leil ho bei ho naxrcixl du lei lol.

Zidu Leil Koxl Dae A Olga Sixl Ar Ddei Zza

¹⁷ Yel ngo Seirpor ddei quexrlixl mel leil koxl dae a, yarzi nia leil quex, nia nixixl goxr a, zeixleixr Yisu leil ddar-nr-zzi su mel sael a goxr nr ddo a. Yaa xiar dae mel mel nrbba xiar lalnga, ca leil seirggiebbær cirdoxr lei nr zza. ¹⁸ Yaa Arbosobo leil nr saexl, nixmox gex, yel hoxr hoxr nr

hoxr nr saexl halae Arbosobo dax bbe kae ho a. Yaa dder Arbosobo ca mel leil gger cirse-cirsil olga ddei li wo nr ddo. ¹⁹ Yaa azo nr seir bei a lei seixlda nr saexl, yel dder ggecir ddei leil cirdoxr lei nr guaxr buxlguaxr-laxlsixr bei ssi. Yaa cirza-hanga nr seir mel bei doxr. Halae nixmox zzar arddolcar lei eil mel leil xiar doxr.

²⁰ Nael nia Zidu dax zza wo mel eine nr nga. ²¹ Nia zza wo, nia bbejjiur wo mel Zidu ddei ddarzi mel dax zox dae, ²² yel nia dder halleix ca li hal ddei nr seir xiar goxr mel pia sael a lixr pixl nia. Halleix nia nixmox zzar nr seir xiar dae hal mel nia leil nol dae a, nia leil ho bei ho nr seir loxr lol. ²³ Nia nixmox zzar xiar dae hal mel maelmaerjgia gierbox nia. ²⁴ Nia ca sixl loxr nia. Ca sixl eil ddei mel Arbosobo armael dax zox dae a coxl teixl lei. Yar nixmox zzar ddarzi mel ji dae a, yel hoxrhoxr mel bei, seirceix-seirmaer loxr.

²⁵ Niul mel ggecir cir ddei leil a niar dae, yel nia zzicarzzi dax ddarzi bbeix nia, ddar jiar bbeix nr ddo. ²⁶ Nia sirzzi arddeirnga a mel, sirzzi dae halcar a zuixl bei ssi nr ddo, merni lal zzezze sirzzi ci nr ddo. ²⁷ Neir zzirmar te nia leil nol a zuixl bei ssi lol nr ddo. ²⁸ Halleix zzaegu ker goxr hal mel mel zeixleixr ker nr ddo, armael ddei armael sulku ssi nia, seirseir bei ssi nia. Eine nga a mel dder zzirbae sser zoxr ca hal mel leil beijjiu cexr.

²⁹ Si leil bbeix no ddar mel cir qier lei bbeix nr ddo. Nia ca leil seirggiebbae zza ddar mel bbeix a ca mel leil nixmox dder vaer nia. Eine nga a mel noni su ca mel leil seir lol var. ³⁰ Arbosobo ddei Xiu ddei nia nixmox zzar hher ji dae a mel hherdder yar nia leil vae xixl lei hoxltexr ddei nga a. Nixixl maele zzir hal cir ni ci a mel, yar dder nia leil jiuxl.¹ Nia

¹**4:30** Niul maelmaerjgia lei zuixl bei a, dixlyuxl gga ze i nia. Nael Yisu niul leil weix a sirnilni ddux a si a, yel Arbosobo dder niul leil ssoxrsuxl a cirse-cirsil yar dax hher dae lol. Arbosobo Yisu ddei sirnilni sser a niul

Arbosobo ddei Xiu ddei leil cix lol nr ddo. ³¹ Nia ca leil vuxryixr nr ddo, hexrcixl-hexrlexr jji mo bei nr ddo, ca leil sirzzi nr ddo, zzi hie nr ddo, si leil bbeix no nr ddo, si leil nr seir bei nr ddo. ³² Zzicarzzi leil perniar nia, zoxlnixr nia, ssoxrsuxl nia, hherdder Arbosobo Zidu leil i dae a niul leil ssoxrsuxl mel sael a nga.

5

Bbele Ggie Nixixl Goxr

¹ Nia mel Arbosobo perniar dae ssormine mel nga a; yel nia azo bei lei Arbosobo dax bei zza nia. ² Nia nixixl goxr a arddolcar lei ca leil perniar nia, hherdder Zidu niul leil perniar sael a nga. Yar mel niul leil weix a olga ddei lei nr li yar ddei ggecir ddei xiuzixzixmo ziddu hal mel sael a Arbosobo leil zi a.

³ Nia mel Arbosobo ddei cassor-worssor a; yel kerjiar su ca nei capor maerssor nr loxr seir zzi dax naer su ca nei nixmox zzar sei-nr-beix su ca, halae cirza-hanga lei yarzi tuxr su ca mel bei dae hal mel nia biar lei biar nr ddo. ⁴ Nia halae yarzi biar cexr, yarzi medeil, yoxl ddar zae nr nga eil mel nrbba nrbba biar nr ddo. Arbosobo leil nawo ddar mel biar nia. ⁵ Nia yarzi saexl nia: kerjiar su ca nei capor maerssor nr loxr seir zzi dax naer su ca nei nixmox zzar sei-nr-beix su ca halae cirza-hanga tuxr su ca mel mel Arbosobo nei Zidu ddei goxr gga seirseir mel li wo nr ddo. Cirza-hanga leil tuxr su ca hal mel hherdder bbex leil zi su ca mel sael a nga.

⁶⁻⁷ Yaa nr seir eil mel bei a, Arbosobo yaa leil sirzzi, yaa leil faxr nia. Ca eil mel mel Arbosobo leil dir su mel nga a; yel nia yaa dax cir piar a bei nr ddo. Ca mel nrbba nrbba nia leil cirza-hanga eil mel bei ddo fur lei a

leil vae xixl lei. Xiboxrlaexr Sul 9:11-28 leil i.

lei nia noni nr ddo. ⁸ Halleix nia mel neixmar ggjie hher dae sael a nga, nael eilleix nia Yisu leil ddarzzi ho a dder bbele ggjie hher dae sael a nga, yel nia nixixl goxr a lei bbele ggjie hher dae ca mel sael a goxr nia. ⁹ Bbele ggjie hher dae ca mel mel seirseir nei hoxrhoxr mel bei, yaa halae ddarzi mel dax bei mae dae. ¹⁰ Nia arddol mel bei a Seirpor ggese mel nia saexl nia.

¹¹ Ca mel neixmar ggjie nr seir bei dae mel mel, nia yaa dax bei dax nr ddo, nia ca mel meiksaer qier leil yaa leil bota nia. ¹² Yaa ker bei dae yarzi nr seir eil mel mel arleixr biar lalnga lei yarzi seixldaddo.

¹³ Cirza-hanga maelmaerjjia lei biar teixl lei a mel dder arsae ngazi saexl ddo a; hherdder bbelele ddei neixmar ggjie zoxl gex dae sael a nga.

¹⁴ Neixmar ggjie de bbo dae a dder azo lei mia ddo, yel ca ar mel a bbeix

“yixrmeixljjiu su ca mel zucur nia;
si ho ca mel gga gol du xixl lei nia;
Zidu ddei bbolbbo mel nia leil zoxl gex dae nia,”

eine bbeix a.

¹⁵ Yel nia azo bei lei fadae nia: ca medeil mel sael a nga nr ddo, hoxrhoxr nr hoxr saexl su ca mel sael a nga nia. ¹⁶ Niul eil coxr gga mel yarzi gexrddo bei su yarzi miur, yel arddolcar seirseir bei cexr mel, nia halcar leil jiux dae a seirseir bei nia. ¹⁷ Nia ca medeil sael a nga nr ddo. Seirpor nia leil azo bei lol mel nia saexl nia. ¹⁸ Zzibbaer ddayixr a mel cirza-hanga nr seir mel bei ssi var. Nia zzibbaer ddayixr nr ddo. Doxgoxleixr, nia Arbosobo ddei Xiu ddei leil nia nixmox zzar bbilbbi hher ji dae lol nia. ¹⁹ Nia Sipi Sul gga ddei ddar nei Arbosobo leil bbeix zae gger dae ddar, halae Arbosobo ddei Xiu ddei nia leil caxl lol mel sser a, zzicarzzi dax biar. Nia caxlgo caxl, caxlgo bbaex a Arbosobo leil bbeix zae gger nia. ²⁰ Azo pex dae lei, niul ddei Seirpor Yisu Zidu ddei mi ddei

leil koxl dae a^m zoxlzoxl a Arbbor Arbosobo leil nawo nia. ²¹ Nia mel Zidu leil gexr a yar leil i du su ca a; yel nia zzicarzzi ddei ddar no nia.

Capor Maerssor Mel Leil Biar

²² Nia maerssor bei su mel nia armael capor ddei ddar no nia, hherdder nia Seirpor ddei ddar no mel sael a nga. ²³ Capor mel maerssor ddei oldde a; hherdder Zidu mel jiaxlhuixl ddei oldde sael a nga. Jiaxlhuixl mel yar ddei ggecir sael a nga. Zidu halae jiaxlhuixl leil jiuxlsu ddei nga a.

²⁴ Jiaxlhuixl Zidu ddei ddar arsae no mel, maerssor bei su mel azo bei lei capor ddei ddar arsae no nia.

²⁵ Nia capor bei su mel armael ddei maerssor leil perniar nia, hherdder Zidu jiaxlhuixl leil perniar sael a nga. Yar mel jiaxlhuixl leil weix a armael ddei olga ddei lei nr li. ²⁶ Yar eine bei a mel, Arbosobo ddei ddar mel leil sser dae nei ajjix sser dae a jiaxlhuixl ddei leil cir xia gger a, seirceix-seirmaer zuixl nr zza loxr lol, ²⁷ jiaxlhuixl leil middux lol, sei-nr-beix cirdoxr lei nr zza, nr seir cirdoxr lei nr zza, botaddu cirdoxr lei nr zza, seirceix-seirmaer loxr lol a armael leil gger lol niazzir a nga arddeir a. ²⁸ Zidu jiaxlhuixl leil arsae perniar mel capor mel lei ciryoxr a armael ddei maerssor leil arsae perniar nia, hherdder armael ddei ggecir leil perniar sael a nga. Maerssor leil perniar a mel dder armael leil perniar. ²⁹ Arseir lei armael ddei ggecir leil vuxryixr su nr zza; halae yarzi guaxr seir, hherdder Zidu jiaxlhuixl leil yarzi guaxr seir mel sael a nga. ³⁰ Eine nga a mel niul yar ddei ggecir leil niar gex dae nga arddeir a.

³¹ Yel Arbosobo Ddei Sul ber leil bbeix: “Capor mel maerssor bbeix a yar armael arbbor-ama dax bbe kae a, armael maerssor dax cirgo a hher

^m5:20 *Seirpor Yisu Zidu ddei mi ddei leil koxl dae* Ddar eil qier ddei yilsi mel dder Yisu leil koxl.

nia. Eine nga a mel yaa nrmel cir ddei sael a loxr a.”^{n 32} Ngo bbeix dae eil mel mel jiaxlhuixl nei Zidu leil bbeix dae arddeir a. Hherdder halleix ca mel nr saexl, yarzi zoxlyoxl hal mel nga a.³³ Nia capor mel maerssor leil perniar nia, hherdder armael leil perniar mel sael a nga. Nia maerssor mel lei capor leil i du nia.

6

Arbbor Ama Nei Ssormine Leil Biar

¹ Nia ssormine bei su mel Seirpor ddei ddar mel dax zox dae a arbbor ama ddei ddar no nia. Eil ddei mel nia bei mibbe.²⁻³ Arbosobo Ddei Sul ber gga miardal a bbeix: “Nia arbbor ama leil i du nia,”^o eine bbeix a. Nia eil ddei dax bei mae dae a mel, Arbosobo dder “nia leil seir lol, nia leil olga si lol.”^p Eil ddei mel Arbosobo miardal dae mel gga yar ca mel leil seir lol nia bbeix har zaxr beil tiuxr nga a.⁴ Nia arbbor mu a mel nia ddei ssormine leil seifu de nr ddo, nia Seirpor xiar dae mel dax zox dae a yaa leil mul gger nia, yaa leil hier vaer nia.

Wormusu Mel Leil Nei Yaa Ddei Seirpor Mel Leil Biar

⁵ Nia zebol mu su mel nia ddei seirpor mel leil gexr a, yaa leil i du a, yarzi yaa ddei ddar noni nia, hherdder Zidu ddei ddar noni mel sael a noni nia.⁶ Nia seirpor mel leil ggese lol a, yaa hher dae bbeixsael nr hher lei ciryoxr a yaa ddei ddar noni nia, hherdder Zidu ddei ddar noni mel sael a noni nia. Arbosobo nia leil bei lol niazzir dae mel nia zabbar seilseir a bei nia.⁷ Nia ggegge-sese a nia ddei seirpor leil visser nia. Yaa

ⁿ5:31 Cuaxlsixljil Sul 2:24 leil bbeix dae.

^o6:2-3 “Nia arbbor ama leil i du nia” Semixljil Sul 5:16 leil vaexr dae.

^p6:2-3 “nia leil seir lol, nia leil olga si lol” Semixljil Sul 5:16 leil vaexr dae.

ca lar nga bbeixarnar, nia yaa leil visser a mel Zidu leil visser dae sael a nga. ⁸ Nia saexl, zebol mu su bbeixsael armael lozza su lei, Seirpor mel yaa seirseir bei dae mel dax zox dae a yaa leil ciryoxr a gger koxl xixl.

⁹ Nia seirpor bei su mel lei zebol mel leil seir nia, yaa leil zux nr ddo. Nia saexl, yaa mel nia dax ciryoxr a merlabbor Seirpor ar ddei zza. Merlabbor Seirpor ddei mel ca nr i.

Zaxlddaexr A Veixrlabox Pia

¹⁰ Ngo halae nia dax ddar biar nr jjia mel biar nia seir. Nia Seirpor dax hher ji dae a yar nia leil gger ddoddomo bbesur hal mel leil koxl dae a yarzi hhel ca loxr nia. ¹¹⁻¹² Nia ca dax zaxlddaexr nr nga a nei, neir dax zaxlddaexr arddeir a. Yaa mel hherdder merlabbor middurbbor neixmarmar ggie quexrlixl zza, bbesur zza neir mel nei neir mel leil guaxr su mel nga a. Yel nia Arbosobo nia leil gger zaxlddaexr a veixrlabox maelmaerjjia veixr dae nia. Eine nga a mel nia dder neir zzirmar te dax ddaexr wor ddo. ¹³ Nia mel neir dax zaxlddaexr, yel nia Arbosobo nia leil gger zaxlddaexr a veixrlabox maelmaerjjia veixr dae nia. Eine nga a mel yarzi gexrddo zaxlddaexr hal cir ni ci a, nia dder ddaexr wor xie, halae zaxlddaexr jjia zzezze ci a lei nia ngier gex ver xie.

¹⁴ Nia arddolcar lei bei har zaxr dae nia. Nia maelsael neixl gex dae nia. Maelsael zex mel hherdder Arbosobo ddei ddarzi sael a nga, yel nia neir dax zaxlddaexr a, ddarzi holcir dae nia. Nia nixmoxzo leil veixrlabox he ar co veixr dae nia. Nia nixmoxzo leil veixrlabox he hal co veixr dae a mel hherdder nia Yisu leil ddarzzi a Arbosobo nia leil zuixl nr zza ca i mal gger ho a. Yel nia neir dax zaxlddaexr a, Yisu leil koxl dae a nixmox zzar seir gaxzi nia. ¹⁵ Nia qixnex ddexr dae nia. Qixnex zze mel hherdder Yisu Zidu ddei ddar seirseir mel sael a nga. Yar ddei ddar seirseir mel ca leil Arbosobo dax toltor a nga lol nei ca leil zzi dax toltor a nga lol var. Yel nia neir dax zaxlddaexr a, nia Yisu Zidu ddei ddar seirseir mel leil

koxl dae nia. ¹⁶ Nia jier ddaexr dil nr ddo, altor lei taexl dil nr ddo he ar co vei dae nia. He eil co hherdder nia Yisu leil ddarzzi sael a nga. Yel nia nixmox cirtaex-lorbba neix neir zzirmar te dax zaxlddaexr a, nia Yisu leil ddarzzi nia. Eine nga a mel yar adoxl bbiu dae jier maelmaerjia ddaexr gel lei a lei, nia dir gex wor xie a. ¹⁷ Nia he kardu taex kox dae nia. He kardu taex mel hherdder Arbosobo nia leil jiuxl sael a nga. Yel nia zaxlddaexr a, nia leil jiuxl wo ho holcir dae nia. Nia Arbosobo ddei Xiu ddei altor baex vei dae nia. Altor eil baex hherdder Arbosobo ddei ddar sael a nga. Nia zaxlddaexr a, Arbosobo ddei ddar holcir dae nia. ¹⁸ Nia Arbosobo ddei Xiu ddei leil koxl dae a azo pex dae lei Arbosobo dax ddar biar doxr nia, yar leil qiuxr a nia leil beijiu lol nia. Nia azo bei lei fadae nia. Halae Arbosobo ddei cassor-worssor maelmaerjia leil weix a Arbosobo dax ddar biar doxr nia.

¹⁹ Nia lei ngo leil Arbosobo dax ddar biar gger nia, Arbosobo leil qiuxr a arddolcar azo biar zoxr ngo leil saexl lol, yel halleix ca mel nr saexl Yisu ddei ddar seirseir mel nixmox vaervaermo ca leil biar gger ssi lol. ²⁰ Ngo Yisu Zidu ddei ddar seirseir mel ca leil biar gger su bei a, ca mel ngo leil neixl gex du lei a. Nia halae ngo leil Arbosobo dax ddar biar gger nia, yel Seirpor leil qiuxr a ngo leil nixmox vaer lol a, zeixleixr ca leil biar gger ssi lol.

Zzasoso Dae Biex

²¹ Ngo perniar dae arzzi-nimar Tuizigur mel Seirpor leil visser su yarzi koxlsseiddo ca arddeir a. Yar nia leil ngo ddei cirza-hanga mel biar gger var, yel nia ngo nixixl goxr a arsaesael goxr dae saexl var. ²² Ngo yar leil zi a nia dax ssi lol a mel dder ngua arsaesael nga dae nia leil biar gger ssi lol a, nia leil nixmox dder vaer lol arddeir a.

²³ Arbbor Arbosobo nei Seirpor Yisu Zidu leil nia leil nixmox zzaso lol nia, nia leil zzicarzzi leil perniar lol nia, yaa leil hanol ddarzzi dax lol nia.

²⁴ Arbosobo leil cirza-hanga seirseir mel niul ddei Seirpor Yisu Zidu leil yarzi perniar doxr dae ca mel leil meixl gger lol nia.